

فہم الملیان

صلاح عقیفی

إهداء

للعطشانيين..

ومحال بيخدعهم سراب

للغرقانيين..

وبيعبروا بجور الصعاب

للشقيانيين..

ومن العرق شرب التراب

للمجروحين..

وجرحهم بالصبر طاب

وللسكن.. رغم الغياب

وللوطن.. بعد اغتراب

ولكل قلب فنى حبه داب

ومع الدعاء المستجاب

..... أهدي الكتاب

صلاح عفيفي

الدنيا صد ورد
ولو تاخدها بجسد
تشكيل تحط عليك
تطلع حبابي عنيك
وتشد شعرك شد

الطعم بيغفر
يحرق دق ويسكر
يحلل ويمرر
والطبع بيحير
والنوب ماهوش ع القد

قربك ويعدك نار
جبار وزيتك حار
دخل في عيبك فجار
أوغله أو صرصار
ما تجيش سيره ل حد

شمع مع الأنعام
واستنشق الأنعام
واتفطى لما تنام
وان صحت الأحلام
الجوزح يطلع فرد

عمر اللي راح مايعود
والجود من الموجود
والسعد للمسعود
أصل الحـرير مـ الدود
والنحل يدى شهد

الدنيا دى حـالها
يا مـهوى هوى لها
مـيل وعـدى لها
خـد منها وادى لها
وسد يا ابنى سد

تهيئات

بيتهألى..

إن الدنيا أمان يا لالى
وبتخلو كمان يا حالولى
حتى البخت نده لى وقال لى
خد من إيدى الشهد وحلى

حكمه قالوها أساتذه كبار
صاحبك لو يقدم فى الكار
راح يتقدم باستمرار
وح يتعلم بالتكرار
مهما العقل صبح ترالى

شـبـر الحـظ بـتـر شـطـاره
والتـرمـاي مـاشـى بـزـمـاره
حـبـة مـلـح سـلـف مـ الجـاره
أـطـلـع اـشـطـب سـطـح عـمـاره
وانـزـل بـالـادـوار عـلـى مـهـلـى

الأـسـمـار بـتـولـع نـار
والأـعـمار مـالـهـاش أـسـعـار
مـابـتـفـلاش عـنـد التـجـار
جـحـا بـيـدور عـ المـسـمار
بـاب الدار مـفـتـوح عـ البـهـلـى

التـنـطـيـط بـالصـوت والصـوره
خـبـطـه أو نـطـه بـنـقـطـه وفـوره
عـيـنـى عـلـى الحـيـطـه المـكـسـوره
دـنـيـا غـرورـه وزى الكـورـة
أـجـرى وراها واشـوطـها بـرجـلـى

أصل أنا باصرف مافى الجيب
من غير ما اعرف إيه فى الغيب
مركب بتودى ويتجيب
والأرزاق أوراق يا نصيب
واللعيب بيصيب ويجلى

طب الحب كـتم على قلبى
ماقدرتش ماعرفتش اخبى
قلت لابوها حكاية غلبى
قال لى أخلى المهر فى عبنى
وماكدبتش رحت مخلصى

سبع البحر رميت له جنيه
يخطف يلهم منه إليـه
كشف البركه يحل عليه
والسـمكه تشبك فى إيديه
يبلغ يشبع مشوى ومقلى

قطر العمر سبقني وفات
والميرى كل منى راقات
سك وقفل ع الكفءات
مابينفءش من الشهادات
غير شهادات البنك الأهلى

أنا ع البر وطاير طير
كافى الشر ووافى الخير
هو انا شايف زى الغير
واللا مخالف خط السير
واللا انا لسه بيتهىلى

بيتهىلى..

بيتهىلى..

الحوافر

الحوافر للموظف
لاجل مايلمع وينضف
والحوافر للحمير
لاجل ما تبرطع كتير

يبقى إيه الفرق بين حافز وحافر
قول يا شحاتر
السؤال محسوب بنقطه
إوع تغلط أى غلطه
أو تقول الفرق نقطه
حسبه من عايزه المغالطه
الحوافر ليها سنه
والحوافر فيها إنه
بس ممكن كل واحد
فى الموالد..
برضه يطلع له بنقطه

ملوقفـه..
ملوشنطـه..
بالحداقـه.. والسواقـه.. والأونطـه
والمـواشـى..
كله ماشى فى الطابور المسطح ع الباجور
والمـلقـح فى المـاجـور
والمـريـح ع الخـابـور
ع الشفـاتـير ضـحـكه بارده
وانت جـواك نار وقـايـده
ليه يا صحابى..
ليه تفكر..

إنت مسـبـوق والـا سـابـق؟
إنت مـلـحـوق وإلـا لـاحـق؟
إنت مـدـلـوق والـا دـالـق؟
إنت مـزـقـوق والـا زـاقـق؟
إنت مـزـنـوق والـا زـانـق؟

مَاعَادَش فَايِدَه م الْكَلَام دَه
رُوح عَلَي سَووق الْحَمِير
وَأَعْمَل مَعَاهِدَه
وَالْمُخَالَصَه بِالْمُنَاقَصَه وَالْمَزَايِدَه
كُل لَعِبَه فِي الزَّمَن دَه تَحْيِيْب فَلُوس
تَتَلْعَب تَبْقَى شَرِيفَه
دُوس يَا صَاحِبِي عِ الضَّمِير
وَأَقْطَع الْإِيْدَ النُّضِيْفَه
لِأَجْلِ تَتَمَعِّنْ خَفِير
أَوْ مَعَاوَنَ لِلْخَبِير
أَوْ سَكْرَتِيْرَ لِلْمُدِير
وَالْحَمْمُورِيَه وَظِيْفَه
الشَّهَادَه.. فِي الْهَبَالَه
وَالرِّيَادَه.. فِي الشَّيْئَالَه
وَالزِّيَادَه.. فِي الْعَمَالَه
وَالْمُسَاوَاه.. فِي الْبَطَالَه
وَالْمَحَاكَاه.. فِي الْقَوَالَه
وَالْمَعَانَاه.. م الْعَوَالَه

صف واقف ع الطواله
جنس من نفس السلاله
بس تفرق برضه من حاله لحاله
فى المعاصره.. والأصالة
بزر ميط.. أصحاب مواهب
خلط ميط.. مريوط وسايب
جحشه وحشه رافعه حاجب
بغله شايله سبعة راكب
شرفوا المعازيم وأصحاب الرواتب
فرقوا البرسيم وشویش یا حبايب
جحش وحشى..

أو فواحشى أصفراوى
زلطى جلطى..

مالطى جـاوى
المخنفـر فى الغناوى
والمشـنفـر فى الحكاوى
والمززرز فى الفـتـاوى

والمعرعر فى الشكاوى
والمجرجر فى الرشاوى
والمبعترع القهاوى
كله مستحمر وغاوى
كله حاوى للبللاوى
والجرا ب يا مافيه يا حاوى

يا بنى جحش الجحوش
رقصتك حلق وجحوش
قرصتك قرصة وجحوش
فرصتك ملو الكروش
ليه يا جحش كفايه حش
دا انت غير رزقك يجريك
لم تحوش..

يا حلاوتك وانت لابس بردعة
جحش آخر مجدعه
إن قالوا لك شى.. تشى

وان قــــــــالوا لك حى.. تحى
لا تــــــــخــــــــتــــــــشى..
لا تــــــــســــــــتــــــــحى..
لا تزعق.. لا تشلق.. لا تنهق
وانت بتجيب الخضار
لا تفلص.. لا ترفص.. لا تقمص
وانت مركوب ليل ونهار
آخــــــــــــــــر المربوط..
ح تترقى إلى درجة حمار
لما تتعلم أصول الفلسفة
لما ماتحوقش فيك اللسوعة
فين دليلك للوصول
ياللى عامل فيها غول
هو إيه ح يوصلك غير الديول
الديول فوق الرجول
الديول فيها القبول
كل دلدول راح ينول
والوظيفة اللى شاغلها

بالوساطه اللي عاملها
واللي غيرك مش طايها
وانت متشعبط في ديها
يا للا غنى لها وقول..
هزي ديلك يا أتانه
فرجيناع التخانة
بلبعي حزمة حشيش
وان كان مافيش اتبعي
وطرقعي حنة لبانه
قبل ماتفوح العطانه
وانتي مشتاله الأمانه
سد خانه..

كل شيء في الدنيا جاي
حتى لو كنا عجاي
نظره ياست العواجز
كله متحفضز وجاهز
بالسليقه والغريزه

جای یبوس یدک یاتیزه
زودیه حـــــــــــــــــتی بریزه
لاجل ماینط الحواجز
واللی یستقرا تواریخ الحضاره
یلقی فیہ أمثال کتیر
من مشاهیر الحمیر
شوف جحا المشهور بعقله وبشطارته
تفتکر کان یشتھر لولا حمارته
دی العباره فی الشیکاره
والشطاره فی الحماره
قال یبوعها..

قال خساره..

واللا سبک من جحا وشوف الحکیم
قد إیه ککاتب عظیم
والأدب أصبح یتیم
بعد ما مات الحکیم
والحمار هو اللی کان
بیقول له ع الرأي السلیم

وانت يا صاحبي بتتجمد فى طوبه
بعد ماتسيح م الرطوبه
يعنى يلزم لك ركـــــوبه
عوجه..

تغنى عن جادون البسكيلته
عرجه..

تعلق فى كارو أو كارتيه
قرده..

أو خنزيره ..

أو حلوفه ..

أو تمساحه..

أو بقره حلويه ..

والأدب بقى صنعـــــه بايره

اركب الموجه اللى سايره

وان ماكنتش ناوى تركب بالأدب

راح تتركب من غير أدب

وان ماكنتش غاوى فته

وفرم كفته..

روح وشوف لك حته ثانيه
أى حته..

فين ح تتعدل وإمتى..
روح وبادعى لك يا صاحبي
لاجل خا طرك..

رينا يتولى أمرك
قبل ماتحفي حوافرك
والخوافز للموظف..

لاجل مايلمع وينضف
والخوافر للحمير..

لاجل ماتبرطع كتير

فوازير محلوله

على مـدفع الإفطار
بعد صيام النهار
يحلّى لنا الفـلـول واللوز
والفرجه على الأراجوز

قمر الدين الجوافه
والنباتين الكنافه
والشمش الخرافه
دول محتاجين تسبيح
الجامع فيه تراويح
والشارع فيه تفاريح
أما الشاشه الصغيره بتقدم المراجيح
واللى يحل الفـوازير
راح يبقى ثوابه كبير
وما تحرقوش النار

التكتوت الصفيح بيصيح على الهوا
ويكسر الصحيح ويفسر الفوا
حللا مصدر محلول
بللا فعل ومفعول
والفاعل فيه مجهول
أصل المخرج مـزـنـوق
والحال في غاية السوء
وما دام السوق محتاج
ح نـبـلـبـط في الإنتـسـاج
ونـلـعـبـط في الإخـراج
ع النـشـاف والمـبـلـول
م الأمـثـال الألاجـه
المحتـاجـه غنـاجـه
ماتـبـصـش يا خوـاجـه
لسـه مـاحـصـلـش حـاجـة
خلـى الـلى يـبـول يـبـول
حـالـو يا بالـو
حـلـاوتـها بـتـاعـة كلـه

وماهياش أى بتاعه
بتأدى فروض الطاعه
على واحده ونص جماعه
تحت الهدوم شماعه
حلقات وحاجات متباعه
ويا تاجر يا شاطر..

على عينك البضاعه
عرض وموصول على طول

مش بس نصوم ونصلى
ناكل نشرب ونحلى
وندور ع اللى يسلى
ولا بد من التنويع
وحصيله من التوزيع
والأجر ماهش ح يضيع
وياذن الله موصول

انتقلت للرحمة الواسعة
صاحبة حرفة قديمه وصنعه
واخذه معاها الصيت والسمعه

المعروفه فى كل زمان
والمكشوفه فى كل مكان
المحبوبه من الألاضيش
اللهلوبه فى التنتيش
الموهوبه فى أى مفشيش

المسحوبه على الدكان
المحسوبه فى خبر كان
المضروبى فى المليان
الملعوبه بعود وكممان

واللى عليها تجوز الرحمه
فته ولحمه وويسكى كمان
ريحه وفايحه من العنوان
سايحه ونايحه على العمدان
والجلاليب راكبين قبايب
والمراكيب عاملين ملاعيب
حطه يابطه

لعـبـوا النطه ولموا النقطه
كانت غلطه صبحت ورطه
آخر لقطه
هاتوا فلوسنا ياسيما أونطه

والتـبـليغ
لحن بيطلع م اللغـالـيغ
سهل الحـفـظ ولفظ بليغ
خش يا ويكاع المزيكا

ليه الناس بيقلولوا هتيكه
سههره بريئه فى بيت فنان
والفنان محتاج ألحان
والألحان عايزه الروقمان
والروقمان جاي م التوهان
والتوهان معناه بالنص
رقص ورفص ..

وهات ياقرص..
هينا مقص وهينا مقص
هينا محافظ بتتقص
واللى عنيه طلعت م البص
كاتب بيسموه الجاحظ
كان بيلاحظ
قارى وحافظ
غاوى مواظ

ومسمى كتابه الحيوان
بيت فاتحينه آداب وفنون
أحلى بضاعه وأغلى زبون
فن عريق وبقي له قرون
والفنان ماسك الواحد
لاجل الواحد

ويبتوسع فى القعه
ويجمع شمل الخلان

والمرحومه ست عظيمه
عليها القيمه وملو هدومها
بس هدومها اتخطفت منها
فى الطياره
آه يا خساره
واهى من يومها

بقت الموضه على العريان
على رأى الأستاذ معلوف

اللى صدر له كتاب معروف
عنوانه الأدب المكشوف

صفحة خمسہ وستہ وسبعہ
آخر طبعہ

ناس حکایتہا کانى ومانى
تقلع تلبس تقلع تانى
هى بتتعب نفسہا ليه
ومافیش سر تدارى عليه
ليه بتغطى مادام بتوطى
والمستور فى النور ببان

المرحومہ تارکہ وصيہ
يتم الدفن فى حى القلعة بدون أكفان
واللى ح يحضر لها خرجتها
واللى ح يمشى لها فى جنازتها
واللى ح يدفنها فى تربتها
يتهوى لو كان حران

بعد المعزى والتعديد
الجانوتييه قفلوا التريه
وسابوا الفتحة.. للتهويه
خش عليها اللى يحاسبوها
تعمل إيه هى ح تتحمل.. لو ضربوها
ضربه فى ضربه بالمرزبه
أصل عذاب القبر شديد
المسكينه جت رجليها حاسبوا عليها
هى دى حسبه

لو مجنونه..

تبقى براءه بالتأكيد

لو مديونه..

فيه متعهد بالتسديد

والتسديد بالعمله الصعبه

حتى فى محضر حصر التركه

الكبريت من أول حكه
والبواب قاعدع الدكه
واللى طفح على وش البركه
جسم سليم خالى من الشكه
شنطه إيد

فيها على وجه التحديد
كشف ولسته بالمواعيد
وموانع مفعولها أكيد
والفلايه

والهوايه ونص مرايه وحلق سكه
يفضل إيه غير حبة فكه
أدى فلوسها

وآدى تيوسها
يبقى حسابها خلص يا ملايكه

ياللى سبكت الطبخ القرعى
ح تروح فمين م الطب الشرعى
حالا بالا

تقرير أصلى وتقرير فرعى
شافوا أطرها وجابوا خبرها
طبيب وخبير

بصموا العشره على التقرير
أهى دبه ووقعت فى البير
والحبيبى واللعيبة
والسميعة والدفيعة
كله ضحيه... كله بريئ
اللاباريق اللاباريق
اطفى العقب ل يبقى حريق
الطاقاطيق الطاقاطيق
سك وقفل ع التحقيق

بس ياناس بطلوا إشاعات
وبلاش حكايات وبلاش روايات
غنوا وقولوا التعلب فات
واقروا الفاتحه على الأموات
واعملوا ختمه..

بالريالات والدولارات
ع اللى عليها تجوز الرحمه
فته ولحمه وويسكى كمان

فلفصة

المسألة متلخصه
المشكلة متشخصه
تعقيل عقول متخصصه
تحليل حلول مترخصه
تأصيل أصول المخصصه

لا حيل مع البأس انقطع
ولا ديل على الرأس ارتفع
ولا عباد فساد ولا زاد جشع
وقول يا واد يابو البـدع
مقتول يا غول المخصصه

الفيل من النمله اتقرص
والوحش م الجـحش اترقص
وأديك ياديك جـوا القـفص
حـتى اللى ع السلم رقص
بتشوفه عين متلصصه

مربوط فى خيط العنكبوت
محطوط فى أكفان السكوت
مشحوط تعيش مسخوط تموت
وعشان ماتفلت أو تفوت
تقبل نصايح مخلصه

فى الزنقه لاتكسر مرور
فى الغرقه لا تعبر جسور
طوف بالنظر والدنيا نور
شوف الخبر بين السطور
منشور فى صفحه مقصصه

السفر فى بئر الصدور
مستور إلى يوم النشور
إن ربحوك خش الطابور
وان فسخوك اقلش ودور
بركوبه خيبه مقمصه

شعرك يشيب فى المصيفه
جلدك يدوب فى المديفـه
إخلع سنان الدغـدغـه
واقطع لسان البغـبغـه
واسمع بـودن مملصه

ودى الهدوم للمفـسـله
وانسى الهمـوم والبلبله
الدلالات همـزـه صله
والبلاعات متـوصـله
إغطس وبلبص بلبصه

جتت جتت متـحنطه
حتت حتت متـتـرـبطه
بالجليطه والجليطه
بتـحب تركب شعـبـطه
تتعـب وهى مقرفصه

الفيلم بعده مسلسله
عقده وشنيطه مفشوله
والقصه رقصه وحنجله
على غنوه فالصو مجلجه
على زمبليطه ومهيصه

يا ابو الميـداليـه مدلدله
م المعـيـله للمـرجـله
خطى وغطى المرحله
شيل من رقبك سلسله
بطل معاكسه وبصيصه

ح تلاقى واحده على المقاس
عـاقله وزيك بنت ناس
ح تقـبـلك على عـين ورأس
وح ترضى بالدبله النحاس
وبشبيكه وزن الحمصه

بالقسط ح يتم الجواز
بشرط قايمة للجهاز
أميز على أبرز طراز
سرير حصير ولبة جاز
والنيه خالصه مخلصه

والخطه لو مستدبره
بالواسطه أو بالسمره
تشبط فى حوش أو مندره
بالمره حوش لك مقبره
ماقتوش موته منغصه

عليك ح نقرا فاتحتك
فى دخلتك وف خرجتك
وراك ح نمشى فى زفتك
وتنام فى ليلة فرحتك
وتقوم عنيك معصه

كبشة بنود متسده
لبشة قيود متشده
دبشة سدود متجمده
تلزم حدود المصيده
تحرم عليك الخلبه

دى صنعك جلو الحلل
وف قترعك ملو القلل
ولدمعك حلو البصل
والنحل ح يخلص عسل
والمسؤوليه منصه

والست بتحب الدلع
وكلامها واجب يتسمع
حاسب ل عينك تتقلع
وسنه سنه تتخلع
أصل العصا لمن عصى

ولو غـوـيـت الـارـتـحـال
ونـوـيـت تـبـيـع عـمـرك بـال
إن كـان دـيـنـار أو كـان رـيـال
طـول مـانـت بـتـعـبـى الشـوـال
ح تحف وتسف الحصا

افـرـش ووشـوش الودع
وارمى بـيـاضـك يـاجـدع
الصـره مـصـروره بـطـمع
والسكه مـسـكوكـه بـوجـع
وما فيش شبع م اللغوصه

ودقـون بـتـحـلق للزبون
مـسـتـنـيـنـك فـى الصـالون
ح ينـضـفوك مـن غـيـر صـابون
ورجـعـت دون وفـلـوس بـدون
تبكى وتشكى المقيصه

وفر سفر ومشوره
عمر في خضره منوره
حصص الأجل متوفره
فرص العمل مستنظره
كتل البشر مترصه

إيه هو مـربط الفـرس
مانسـيبش سايب بالفلس
ولاناب دبابه يتـفـرس
وليل نهـار عـسس حـرس
وفيه رقابه محرصه

سك الصـفـايـح والزـلـع
فك اللى صـالـح مـ السلـع
الخـتمـع اللحم انطـبع
والشـحم سايـح يتـبلـع
والعضـم رايـح مصـمـصه

خـلاص بقى بحلق عنيك
والحق خـلاصك بين ايديك
دى شكـوتـك منـك إليـك
وان دنـيـتـك ضاقت عليك
فى الخيه فلفـص فلفـصه

عريس الغفلة

يا عريس الغفلة تماسك
قبل ماتعلن إفلاسك

مرسوم وعليك القيمه
ماتقولش نجوم السيمه
صف زراير بريمه
والكرافته على مقاسك

عامل هيصه وهليله
والعيله وعيلة العيله
والفرقه بتحى الليله
قال إيه .. ح تشرف ناسك

حالتك صعبانه عليا
وح تندم ع العـزوبيه
وتقول فـين الحـريه
ومنين ح تلاقى خلاصك

روح دور لك على شـقه
وعـلاوه تنزقك زقـه
وتعيش وتاكلها بدقه
وتشيل همك على راسك

تتعـب تغلب تتـشـقلب
وح تتـبرى وتتـأـدب
وجـيـوك راح تتـقلب
وتعد عليك أنفاسك

خليها توش تدش
واعقل وف جلدك كش
وف غلك إوع تفش
وح يتبدل احساسك

واكمنك حيله وشحته
وعروستك طلعت فلتته
وطلعت لها من الكرتة
حصلها القطر وداسك

تماسك..

تماسك..

ص م بكم

يا مقسم القسمه بالعدل متسمه
لك فى قضاك رحمه وفى ابتلاك حكمه

الفهم والتبيان ومدارك الانسان
منه من المنان تنصان مع الإيمان

بالهمه والذمه

أما اللى راكبه شيطان بالزور وبالبهتان
يتقال عليه حيوان والنعمه لوتنهان

بتنقلب نقمه

الفشوره والكذب والحشوره والغلبه
والعيبه تتعبي وتصبم القريه

بتنسب الأزمه

رغای ورغایه ولسان بدلايه
ینکش بفلايه ینتش بسلايه

ويدشدش الكلمه

اللى انقطش له ودان بطناشه عاش سلطان
لا بيوحشه روقان ولا تدوشه الحان

ولا تخدشه شتمه

واللى انكمشش له لسان واتحاش من الهذيان
وما قالش كنا وکان يتغطى بالکتمان

وما تلبسوش تهمه

قسم حكايته ع الوتر موال صباه
سوق البشر ملىان عبر والدنيا غابه
واللى مالوش أنياب بياكلوه الديابه

يا ورد ليه يجنى عليك عطرك ولونك
وتنقطف قبل الأوان من فوق غصونك
والشوك وأصله بيتسقى عشان عيونك
بيتقى الجانى وتحميه الصلابه

يا طير مهاجر عود على وعد الأمانى
وحبه حبه لما تبنى العش تانى
الجو يصفى لك وتحلو الأغانى
وراقب الصياد وحاسب م الإصابه

وديت جناحك فين يا عصفور السرايا
والصوره غير الأصل فى عيون المرايا
قشرة ذهب تلعب بأحلام الصبايا
حتى القلوب عرض وطلب يا دى الغرابه

ياللى طواك الفكر فى بحوره الغريقه
وصحيت تدور ع الطريق وع الطريقه
الحب ح يرسيك على بر الحقيقه
وفوق شراقى القلب ح تمطر سحابه

الظلم ساعه وأخرته هم وندامه
والعدل بتدوم دولته ليوم القيامه
والحق هو المستحق للكرامه
يارب يا جابر تعوض ع الغلابه

قطر الصعيد

يا قطر سكه حديد	مشوارنا لسه بعيد
إجـرى ولا الرهوان	
لكن على القضبان	
لاجل الوصول بأمان	ولا تخلف المواعيد
الرحمه بالمخاليق	سفره زحمه وضيق
بنعد فى فلنكات	
ونعدى ع القنوات	
نطب فيها ساعات	وساعات يشب حريق
لسان من الدخان	صدر بشأنه بيان
إن القدر مكتوب	
وما كانش فى المحسوب	
وينشوى المنكوب	وينكوى الغلبان

قـهـوـه وشـاى وبـاجـور	بـجـاز و غـاز بـيـدور
جـدار و سـقـف صـفـيـح	
لـوشـم نـار بـيـسـيـح	
و ان هـب فـيـه الـريـح	مـين يـمـنـع المـحـظـور
كـان اـحـتـفـال العـيـد	بـالـصـوت و بـالـتـعـديـد
و غـلـيـت الـأـتـمـان	
و رـخـصـت الـأـبـدان	
و انـجـمـدـت أـحـزـان	و انـحـاشـت الـزـغـارـيـد
أرواحنا والأُمـوال	بـتـروـح مـع الإـهـمـال
ولـيـه عـذابـنا يـطـول	
لو نـنـتـبـه عـلـى طـول	
و نـحـاسـب المـسـئـول	تـتـعـدـل الأـحـوال

انضباط

يا شاوليشنا يابو الانضباط
خفه ونشاط.. زى القشاط
إنت اللى حامى للوطن
من الفتن ومن المحن
عشان كده
ح نسمعك.. وفتعك
وح تنبسط آخر انبساط

سلامات ع الدوريات
يا أميين الورديات
التعلب عدى وفات
بيبحلق لك بعنيه
مايهمش بيه ولا تيه
اتجدعن خش عليه
ونحط صاجات فى إيديه
واحنا بنرقص حواليه

الجد وغيره مافيش
ماتاكلش من التهويش
والنويه سمح ياشاويش

الإجراءات نتممها
وأى كلمه نللمها
مفهوم زمان كان وانتهى
إيش تاخذ الريح م البلاط

تحبيه يا صول المرور
صفاره وإشارة عبور
خلى العجل يرجع يدور
وبهممتك مشى الطابور

شقق بقق.. حاسب تقع
إروع المطبات والرقع
إياك حزامك يتقلع
إسمعى ووسع يا جددع

حسب القانون المتبع
بكره الشوارع تتسع
بكره الحوادث تتمنع
ومافيش مخالفات تندفع

ع الكوبرى أو تحت النفق
لاحد طالع ينزلق
ولاحد نازل يندلق
ولاحد فى الزحمة انخفق
واللى يسوق ينسى القلق
وكأنه راكب ع البساط

يا بوليس النجده انجدنا
فى البوكس تعالى وخذنا
النور مقطوع م الحته
ومافيش الميه البته
الواد طفشان من مده
الجوز مش لاقى الفرده

الست معـهاها أبو ورده
الجارح الجار اتعدى
الونش انشال بالعده
النار مسكت فى العهد
الحيطة ومالهـاش سنده
الزيطه بتعملـا ماتهدا
تلبـيخ ومقالب بارده
وطبيـخ بيـمشى المعده
والحالـه فى غايـة الشـده

بلاغ وراه مليـون بلاغ
أهى حاجـه تدوش الدماغ
والإشكالات قـملا الفـراغ
والضحك يقلب بالعيـاط

يا حـضرة الضابطـة تمام
صبح ومسا ألفين سلام
ع الأمن وألسطه النظام

الشرطه عينها مفتحه
وليل نهار مصحصحه
بتدلنا ع المصلحه
وتحوش بلاوى مسيحه
شعارها خدمه شعبنا
بنحببها.. وتحبنا
ندعى نقول من قلبنا
ياربنا.... ياربنا
يتم بينا الانسجام
بعيد عن اولاد الحرام
وننام ونحلم بالسلام
والشرطه فى ايديها الزمام
ونصحى مانشمش شياط

كوسه

كوسه وقرع وقرع وكوسه
أحلى وأطعم م البسبوسه

وجبه شهيه.. للتقويه..
متنقيه..

والفيتامين خالى من السوسه

مهما نقصقص.. مش راح يخلص..
ولا راح ينقص..

محصول الأرض المحروسه

تلحق نهبر.. قبل مانحجير..
ريك يستر ..

من شر العين المفروسه

أكبر فايده.. علينا وعايده..
لقمه وزايده..

تهضمها المعده المكبوسه

ننزل نطلع.. نزرع نطلع
نقرا ونسمع..
أحوال الدنيا المعكوسة

نرقع نخبط.. وينستعبط
حاجه تلخبط..
هى دى بوصه واللا عروسه

قول يا فشار.. مين فى التجار..
مين فى الشطار..
عدى المليار وعليه بوسه
من غير تعليم ولا سين ولا جيم
فيه درس عظيم
لعقول الجيل الملحوسه

أولى حضانه .. تانيه رطانه
تالتة حصانه
تنفع تشفع وقت الحوسه

الأرض مداس ورفعنا الراس
وبنينا أساس
يغنيننا يا ناس فى التفليه

قهوه زياده طعمها ساده
وزى العاده
لا هى ملموسه ولا محسوسه

آخر قفشه.. تعمل دوشه
تحصل روشه
توصل للحركه المفقوسه

لفه بلفه.. لايستكفى
ولا بيتخفى
كذاب الزفه المهووسه

فلفل شطه.. شفطه فى لهطه
كالتها القطه
فى برام الخطه المدروسه

لعبة الحرب ٣٢ قطعة شعر

الحرب لعبة ذكاء ومن الدهاء جيروت
مظهر من العنف بيعبر عن المكبوت
ويظهر الضعف لو كان الدماغ مخووت
يقتل سواعى الملل يشغل فراغ ممقوت
سلاح مباح ومتاح والاكتساح موقوت
خناقه بين أبطال والاتفاق مبعوت
بين الدول أوقات وبين صالات وبيوت
وتبتدى المصمعه والجو كله سكوت
حشود ومتجمعه صفين ومالهش صوت
والنقل بالعقل لا بيعمل لابيبي ولا توت
وهس ماتحس حتى زنة البرغوت
لاقنبله بتنفجر ولا صاروخ سوليوت
ضرب البونيه اتمنع و البكس والشلوت
وفيه نظام متبع على الرقع مثبتوت
بالجنب أو بالطول فيه سكه للى يفوت

والأكل من غير غموس ولا عجين ملتوت
والقطعه مش بفتيك والحتته مش بسكوت
لانزاع على قراريط ولا صراع على قوت
بس أنتحدى وصل إما انتصار أو موت
والكمبيوتر دخل وله حساب وكروت
واللى بيقع فى الخط يتحط فى التابوت
خطط كما السحر من أفكار هاروت وماروت
أنماط من الخراط خشب عجب منحوت
وصف عسكر خفر حرس بدون نبوت
أما الفرس نطاط أصل الرباط مفلوت
والفيل على الاجناب هزيل بناب مسلوت
والطاييه فى حجمها أصفر من الكتكوت
أما الوزير الخطير مافيش معاه سحتوت
وعشان مانفدى الكبير بنضحى بالسفروت
ومش بعيد لونرقى العسكرى العكروت
ممكن كمان الملك فى كشه واحده يموت
والملك لله وهو صاحب الملكوت

دنيا

يا دنيا حالك عجب
يا ام التراب والذهب
ياللى عليكى الطلب

اللى احنا منه إليه
يا فانيه عندك إيه
نضحك ونبكى عليه
غير القضا وانكتب

ما بين مسا وصباح
الحزن والأفراح
مأساه عليها نواح
ملهاه وفيها طرب

معدوده بالدقات
محدوده بالميقات
وكل شيء منفسات
إن كان حسب أنسب

يا خاينه وينعشك
أوهامنا بتصدك
أحلامنا بتزورك
ماينوبنا غير التعب

قسمه ويتقسمى
فى النعمه ويتحرمى
لو كنتى تتكلمى
وتقولى إيه السبب

ماين زمان ومكان
فمين اللى كنا وكنا
وما عاdash فى الإمكان
والحب .. أين ذهب

ثنائيات

تطلع عالى وتنزل واطى
ترفع راسك واللا تطاطى

البهرجه والفرنجه
معناتها قريه منتجيه

مؤسسة اعلان
كانت جاموسه زمان

عين البطون مبرقه
والأكل زى الشبرقه

بيمص شفاطه
ويبص بقلاطه

طالعين م البيضه
والريش ع الموضه

ثنائيات

فـاضى وعـامل قـاضى
جـاهل بـجـهـلك راضى

مـادام بـتـحلف مـا انتـش صـادق
ومـادام مـوافـق تـبقـى مـنافـق

يـا مـدارى وـشـك بـالقـناع
وـشـك الأـصـلـاتـى ضـاع

مـرفـوع شـعار الوـطـنـيـه
مـوضـوع سـتار الوـصـولـيـه

الـنـطـع الحـبـلـيـن
بـيـكـعـبـل الرـجـلـيـن

الـزـنـع الـوـدـنـيـن
يـفـلق حـجـر نـصـيـن

بلدنا سلوها کــــــده
لحمه وفراخ مجمده
وحبوب شباب مستورده

لاجل الروتين رسم المدير
فوق الجبين عصفور كبير
وعليه قفص أحسن يطير

عند اللى عقله محيره
كلام كتير بيعترة
ويجيب حمام ويطيره

بيب وألوه.. عرييه موييل
والجاهل بيسوى هوايل
إشمعنى العاقل مش طاييل

يا راكب ع الغايه وسايق
ويتتعجب ويتتعاقب
إطرينا باللحن الفايق

قلنا وقـال خلص الموال
حب وطب ولعب عـيال
لما عاـدش كلام يتـقال

الدنيا بتلف لا بدايه ولا نهايه
كل المواليد عرايا واسأل الدايه
وفرع واحد طرح فله وسلايه

الحاله سهله وحتى العمله مش صعبه
لفيت بلاد ما لقيت أصعب مش الغريه
والصفر أكبر عدد لو نحسب الحسبه

خليك فى حالك وخلي الملك للمالك
أهلك ومالك غوايه وكلته هالك
إسلك سبيل الهدايه تلتقيه سالك

كاس الهنا

يا ساقى كاس الهنا للناس وناسينى
اشمعنى يعنى أنا مش راضى تسقينى
قول للزمان يازمان امتى تهينى
واللا الرضا بالهوان مكتوب على جبينى

يا ليل أنا صـاحى
.. ليلاتى صباحى
دبلان مع شـمـوعى
.. حيران مع دموعى
والجـمـر فى ضلوعى
.. مستنى أفراحى
لو كنتى بعد السهر
.. يا عيونى تتراحى
أهات تصـحى آهات..
ولا تهذا بالمره

وشریت م الذکریات..
کاسات هوی مره
هو احنا بعد اللى فات ..
ح نعيش کمان مره
لا نوم بیهنالى..
ولا يوم یحلى لى
لیه یازمن غدار..
بتعصر الصبار علقم وتلالی
لا زهقت منی ولا صعبان عليك حالى
ماتسیبى فی حالى
شوف حد غیر دانا فیا مکفینى
ماتقول لى إیه یازمن بینک ومابینى
یا ساقى کاس الهنا..
للناس وناسینى

فردت الشراع

أبكى واقول للفؤاد يصبر على نارى
وخلى دمعى اللى قاد يا عينى متدارى
لا حد شاف دمعتى ولادرى جارى
أخاف يقولوا اشتكيت بتقل مقدارى

أنا فردت الشراع خدنى الهوى وياه
لا قدرت المه ولا اتحملت مر هواه
وضربت بالمقذاف والبحر خدنى معاه
أكلم الموج ألقى الموج يقول لى آه

سبع بحور فتهم ونزلت تحت القاع
صدف وياما صدف والبحر فيه أنواع
وغرقت واللى غرق صباد يكون طماع
واللى يفوته نصيبه لا اشتري ولا باع

وطلعت فوق الجبال وعشت فيها غريب
القرب عنى بعيد والبعد منى قريب
وقلت للحب لو تسمح تسبب وأنا اسبب
وقلت يا صاحبي أريح لى أصحاب ديب

وطرت فوق السحاب والفكر كان لى جناح
من بعد قلبى ما شاب فى الحزن والأفراح
اندم على اللى جأى واللا على اللى راح
وازاى افوت دنيتى وضميرى غير مرتاح

إلى صديقي اللود

أنا مش غايب أنا موجود
بعد مفايب بكره أعود
زى الطير بجناح مفرد
ولا تمنعنى سدود وحدود

الناس ليها عيون ألوان
عين بتواسى وعين شمتان
ده بيقاسى وده فرحان
مين على حق ومين غلطان
خصمى حميم وصديقى لود

كل ذنوبى سلامه النيه
وعيوى طيبه وحنيه
عمرى ماشلت فى قلبى أسيه
واللى شطح وبينطح فىيا
صاحب ليا صبح نمرود

صاحبى وصاحبك كان يا ماكان
إسمك فى زوايا النسيان
مش ح اعتبرك فى الحسبان
خنت وهنت مالکش أمان
يا ما خلفت ماصنت عهود

لا بتعرف معنى المعروف
ولا بتقدر أى ظروف
وشك دا مش وش كسوف
واما تشوف غشك مكشوف

تضحك ببلاده ويرود

إنسى العيش والملح سنين
إنبش وارمى كبوش الطين
سن لسانك ع السكين
اطلع من جلد التعمابين
واخلع م الود المفقود

مهما بتتحدد أوضاع
مهما بتتجدد أوجاع
مش ح ابكى ع المال لوضاع
ولا ح اشكى محتال طماع
عوض العبد على المعبود

المستقبل لو مجهول
والسيف لو مسلول على طول
أنا مش ح اسأل ع المسئول
وعشان قلت ولسه باقول

يمكن ع اللى انا فيه محسود
عشت وشففت كـتير يا زمانى
غنيت أفـراحى وأحـزانى
ومليت سمع الدنيا أغـانى
يعنى أغنى على إيه تانى
قبل لسانى ما ياكله الدود
الأرواح ويا الأبدان
زى المسجون والسـجان
والإنسان هو الإنسان
من بره وجوا القضبان
فى الأيام البيض والسود

كنت ح اعانى من الحرمان
واندم على كاس الندمان
لولا بـقيـه من الإيمان
والإيمان لو كان له مكان
يبقى اليأس مالوهش وجود

ناس وناس

دنيـــــــــا المظاهر والفلوس
الفاضي بيـــــــــعبى الكؤوس
وغــــــــراب بيلبس ريش طاووس
وما ينتهيش طمع النفوس

فبيـــــــــه ناس لها أسلوب ردى
بتــــــــــــزق وتشق الطريق
وعــــــــشان تقب من الغريق
بتشب فوق الإيد تبوس

وناس تلون وشــــــــــــــــها
عــــــــشان قن كرشها
وكــــــــمان تزين فرشها
بقرون ولا قرون التيوس

وناس بتنسى أصلــــــــــــــــها
وتخون صــــــــحابها وأهلها
وتــــــــهون وترضى بذلها
والقرش ع المتعوس يدوس

ناس أكلالين لحم الكتوف
والمستغفلين الظروف
حاجزين كراسيهم صفوف
ومرتبين غمر الجلوس

وناس علل والزوق مـفـفـيش
من فوق وتحت ماتختـشـيش
ح اطفش بعيد عنهم واعيش
وارتاح وينزاح الكابوس

ع الأرض ح افرش صفحتي
وانشر كتابي وقصتي
مدرستي ريشتي وفكرتي
والفن فيه كل الدروس

الفكر بالأنوار يطوف
وكان زمان فيه فيلسوف
يقفل عنيه عشان يشوف
وبالنهار بيشيل فانوس

صاحب المبادئ مش فقير
ومافـيش غنى من غير ضمير
والحب يا وطني الكبيـر
هو اللي بيعلى الرؤوس

قلم ووجبر وورق هم النديم والكاس
استغنى بيهم عن الدنيا وكل الناس
أنا عشت في دنيتي بين الأمل والياس
اليأس عندي غلب والفساد ضرب في الراس
فلاح وأرضي براح فيها الذهب والماس
زرعت ورد الأدب بيحط الأنفاس
أهديت بلادى حصاد الفكر والإحساس
أبدى غيرى على روحى وأنا محتاس
ولاجل ما اسدى الجميل فرشت خدى مداس
والدنيا فيها الأصيل وقت اللزوم ينداس
والبحر ببشيل عويل ويغرق الغطاس

قلم فى إيدى ومن فرط الألم بينوح
فى الشكوى صوتى انكنم ليه يا نغم بتبوح
لا عاد يفيد الندم ولا البكا والنوح
القلب يا ما اتوجع وياما قاسي جروح
ولما خف الوجع كان الجريح مدبوح
مشيت فى أرض العدم وياروح مابعدك روح
أسمع صياح الصمم واشوف براح ممسوح
وف كل خطوه قدم باب الزلل مفتوح

لافيه دليل يتسأل ولانور أمل بيلوح
راح السبيل واتبدل مطرح ماكنت باروح
وكل ماجى اتعدل ألقى الزمان ملوح
يارب إيه العمل فى اللى انكتب فى اللوح

جفانى نوم النهار من بعد سهد الليل
أصبح مع الأفكار والنار تقيد بالليل
ودابت الأوتار من آه ياعين وبالييل
ونجوم تدور فى مدار عنى ماغابت ليل
شافت معايا ليالى شفت فيها الويل
أشيل واحط الهموم وغلبت حظ وشيل
حمال أسى والأسى كيال ووافى الكيل
خيال بقيت رجال داست عليه الخيل
برك الجمل ما احتمل جبال تهد الحيل
نشفت دموع المطر والعين بتنزف سيل
والشمس لما انكسر نورها ومالت ميل
لاعرفت اجيب القمر ولا طللت نحمه بديل

كتب القدر ما محاش هو القدر يتحاش
لما زمانى غدر والعمر بعته بلاش
العين عماها الشرر من عين ماتتوصاش
جانى الملامم اللى يسوى واللى مايسواش

وساب معايبه وعاب فيا غراب نباش
حتى اللى جنبى وعن قبرى ما يستغناش
وكنت عنه باحوش حاشنى وعننى ماحاش
ومن وحوش البشر حوش عنى يا حواش
عذاب وفكر وسهر وياريت انا ما اصحاش
وان حد جه وافتكرو قولوا له راح ولا جاش
ما بقاش فى حاله خطر وما يلزموش إنعاش
عن الوجود اقتصر مفقود لامات ولا عاش

واللى جرى لى ما كان يخطر على بالى
ولسه يا هل ترى فيه إيه ح يجرى لى
فتحت بابى ولا صحابى مقام عالى
ومن كنوز الأدب كونت راسمالى
ولما راح مالى قال صاحبنى وانا مالى
ولما باعنى ياريت كان التمن غالى
أما الحبايب شكيت منهم لعزالى
الناس فى حالهم وخلينى أنا فى حالى
أرضي بحياتى ومين من الهموم خالى
واقبل جزاتى وادوق المر يحلى لى
واخلى قلبى حجر أنحت به تمثالى
ودمع عينى اشربه واكتب به موالى

ما يطلبه الحيوان

ما يطلبه الحيوان برنامج بالألوان
للفن وللفنان بيقدم للإنسان

أفكار آخر روقان

أصل احنا فتحنا محطه بتجيب ع الموجه الهابطه
أسعار الموز أبو نقطه أخبار من خربت مالطه

وحوار أبو نص لسان

بنألف أى كلام ح نكلف ليه وبكام
د الفيلم طبعى وخام والغايه عليها زحام

وبقت مشروع إسكان

بنصور بالشقلوب ونطور فى الملعبوب
وندورع المشطوب ونحور فى الاسلوب

والعرض جنان فى جنان

الدبه نجيبها تضيع مع ديب حلو التقاطيع
من أرقى وأنقى قطيع ونطبعهم تطبيع

ونلمعهم لمعان

نسأل وسؤالنا يا بيه احنا اللي نرد عليه
بريه منك بريه ويتحشر نفسك ليه

فى الفاضى وفى المليان

أبطالنا من المشاهير نسانيس ومعيز وحمير
وحسب طلب الجماهير بنلبسهم طراطير

ميت فل على الجديان

نتقابل نص الليل نتمايل زى الخيل
نرقص ونهز الديل ومعانا عرايس الليل

بتدور ع العرسان

يا أسامى بلاش فى بلاش سمعان أبو ودن طناش
وفصيح أبو صوت متحاش أما احنا مانتسماش

وكمان مالناش عنوان

بكوات مالهومش ديول وكلامهم فى المحمول
بيغلوا علينا الفول من حق أخينا الغول

يشبع مايباتش جعان

حبيبنا سويًا سو فى جنينه حبسوه
حموه ولبسوه ومهما استأنسوه

مايحبش السجنان

وان قلنا ارتحنا خلاص وانزاحنا من الاقفاص
الكاو بوى القناص ح يطس علينا رصاص

ما بقاش فى الدنيا أمان

اشمعنى البنى آدمين طب ما احنا كمان عايزين
صرف بطاقة تموين صك بوليصة تأمين

م القنص وم العدوان

مطالبنا وليها أساس مساواه بين الأجناس
وح نعمل زى الناس ونغطى الديل والراس

ونسيب الباقي بيان

كوميديا

الدنيا بتألف روايات
كوميديا بتلف محطات
ومسلسلات حلقات حلقات
ساعات تروح وبتيجي ساعات

القصة زي مانرسمها
ونرصها ونكسمها
نرقص لها ونحزمها
ونصوص بتتقسم بصاجات

ممر الزمن ع البنى آدمين
وقرونه زادت ع العشرين
من عهد أجدادنا الفراعين
لحد أسلافنا البكوات

فى اللعب بنسن القـوانين
فى الغلب بنفنن تفـانين
ومين بيتشقلب على مين
والكذب يتعبى اسطوانات

السـخريه باب للأفـراح
يفـتح نلاقى الهم انزاح
وان كان عليه ضبه ومفتاح
الضحك بيفك القفلـات

بلا قافيه معدوم العافيه
أول ما بتجيله الكافيه
يشرب من الضحكـه الشافيه
يتداوى ويقوى العضلات

غريق في قشه بيتشعلق
ما يتخنقش لو استنشق
لولا اللي مغمى عليه فوق
بالتريقه كان طق ومات

على إيه ح نزعل ونكشـر
ودمنا ليـه يتـعـكـر
واحنا اللي جايين من كـرـر
ومن الفسيخ نعمل شربات

نبكى ونشكى مالوش لزمه
طول ما الشفايف مبتسمه
البسمه بتحل الأزمه
والنكته بتحلى النكبات

حوار مع البخيل

الراوي:

بخلاء لكن مشاهير
للجاحظ ولوليير
ومعانا بخيل بنكير
والبسخل نوادره كتيير
والضحك طبيعي مباح

البخيل:

فيها إيه لو كنت بخيل
وماليش في البخل مثيل
البسخل دا طبع أصيل
أمال فاكريني عويل
وسايبها سداح في مداح

الراوي :

لايتطلب ربع كسباب
ولا كسباباية عناب
ولا لك في الحظ مناب
وعليك يتسك الباب
بالضربه وبالمفتاح

البخيل :

عاشق مـعدن رنان
له وزن وله لمعان
أشبع لو كنت جـعان
والقرش معايا ضـمان
وأضمه وأبات مرتاح

الراوى :

صرا صير ودنك بتـصوع
والفـار بيـعضه الجـوع
والعـيش الكـسر رجـوع
والنور زيـك مـقطوع
والبيت بيت الأشباح

البخيل :

بيـجـينى طفـيلى لئـيم
وضـيوف فـاكـرينى كـريم
ويـاعـينى عـلى المـعـازيم
والـمش بـدودـه قـديـم
ولا مـشمـش ولا تـفـاح

الراوى :

باب الرضوان مفتوح
وروايح الجنه تفـتـوح
من بيت إنسان بحـبـوح
في الحـزن يداوى جـروح
ويجامل فى الأفراح

البخيل:

عـاـيـزـيـنـى أود الناس
واشـارـكـهم فى الإحساس
واحتـبـاس واشكى الإفلاس
ورصـيـدى يعـود بمسـاس
لا فوايد ولا أرباح

الراوى :

آخـرـتـهـا تـطـق قـمـوت
ماتـاخذش معاك سحتوت
وخـشـبـتـك لما تـفـوت
يـدوا لك بـالشـلـوت
ويقولوا الهم انزاح

مريض الوهم

ماتشيلش الهم ياعم ولا تسأل ولا تهتم
خليك فى الهم المم الضحك طبيب ومداوى
يمسح جرح المأساوى مولير قالها فرنساوى
وروايته رواها الراوى سماها مريض الوهم

المريض على السرير والأهل يلتفون حوله

الأهل : طويل عريض ليه بيعيط
دا مش مريض دا بيستعبط

وكل ما بيجيله الدور
نعمل له زار ونجيب له بخور

المريض : طبيب نطاسى أخصائى
هو اللى يرسى على دائى

الأهل : ننده لحلاق الحشته
وتخرجى يكتب له روشته

المريض : لازم يكون أستاذ معروف
وانا اللي باتولى المصروف

الأهل : نطلب له أغلى مداوى بيطار
نكذب عليه ونقول له حمار

المريض : فيه حد بيخبطع الباب
روحوا افتحوا يبقى لكو ثواب

يدخل الطبيب معلق على صدره يافطه

الطبيب : يا عيانيين اقروا الاعلان
أنا اسمى دكتور مكسوريان
حاصل على كل الشهادات
برخصه من أرقى الجامعات
مختص بجميع العلاجات
عيال ورجاله وستات

ومشخصاتي بقي لى زمان
ماجاش عيادتي ولا عيان
وبلغنى إن البيه تعببان

الأهل : تعالى شرف يا دكتور
اكشف عليه وعليك النور

المريض : الكشف يكون كالعادة
مجانى واللا بزياده

الطبيب : خصوصى مش كشف أونطه
واقروا الفيزيته على اليافطه
وفيه ضريبه وفيه نقطه
دا غير رسوم فتح الشنطه

الأهل : حلال عليك بص وشوفه
مكبوت وح يموت من خوفه
حاسب ل تطلع زرابينه
وان شاللا تقطع مصارينه

الطبيب يفتح الشنطة

الطبيب لنفسه : شاكوش وكماشه ومسامير
أزغزغه على طول ح يغير
ويقوم بسرعه ويتنطط
ويطنه مفتحوه بمشرط
وادی الحبال أحسن يهرب
وسلك مكشوف بيكهرب
والكلييه فى الحوض محطوطه
وطبيعى مش ح انسى الفوطه

المريض : حرام عليك أنا مش ناقص
لا فيا كبده ولا قوانص

الطبيب : انطق وقول فين يوجعك
وازعق قـوى ل اقطعك

المريض : يا عيـنى آه .. ياودنى آه
يا بطنى آه.. يا كلى آه
وآه وآه .. وآه وآه

الأهل: شريط عبيط يا ما سمعناه
علق عليه ودوشنا معاه
رحنا الإذاعة وسجلناه
من غير مانعرف إيه معناه
وحيلتنا إيه غير قولة آه

المريض: جراثيم زكام بتقريفنى
ورغم أنفى بتخنفنى

الطبيب: نكسر له عظمة مناخيره
أول ماتنزل برابيره

المريض: الراس ياناس مليانه صداع
إزاي ح انام من دى الأوجاع

الطبيب: معناه على الزيرو دماغه
ودواه نلطش له صداغه

المريض: الزن فى ودانى بيدور
ويرن صوت طبله وطنبور

الطبيب : ألفين سلامه على الصرصور
لا النحلة زيه ولا الدبور

الأهل : طناش ولما نكون عايزين
له ودن طين والتانيه عجين

المريض : رجليا مش شايله الجته
وايديا واكلاها العته

الطبيب : رجلك على الفته كوارع
وايديك مقشات الشارع

الأهل : البهلوان يمشى على إيديه
فى السيرك ويرفع رجليه

المريض : هزار سخيف ودا مش وقته
أنا لازم اعمل كونسلتو

الأهل : احنا قرايبك وحباييك
واسمع كلام اللى يحبك

الطبيب : حالا وبالا سيـب فرشك
وفزل اغرزها في كرشك

المريض ينزل ويجري والطبيب يطارده

الطبيب : تشخيصي قال إيه مش عاجبه
يشفى المريض إيه غير ضربه
الضرب بيصحى الإحساس
مابتفهموش فى الطب يا ناس

الأهل بتوسطون المريض ويرقصون حوله

الأهل : ياعم وهمك بيعييك
مسكت فيه ويمسك فيك
ارقص وهيص ولاتهم
ياعم دا انت مريض بالوهم

الراوي :

ياما فيه عتاوله وجبابره
طالعين من الدنيا بحسره
دا غير عذابهم في الآخره
الله الله يابدوي جاب اليسرى

منشور عليه طابع دمغه
الدكتاتور لما بيطفئ
ماينويه غير ضرب البلغه
ودي حكمه بالغه ومعتبره

نيرون وهتلر دول وحشين
متربعين فوق العرشين
نقلب صورههم ع الوشين
ونطرق الاتنين بصره

الأولانى نيرون مخبول
فى زوره عقده وبالع غول
واخذها بالعرض وبالطول
لايراعى ذمه ولا عشره

عبيد يصدر ليها أسود
ويجيب حريم القصر شهود
ويحرر العبد المنكود
لوع الأسد جت له القدره

له فى التاريخ أعظم إنجاز
روما القديمه حرقها بجاز
قبل اختراع أنابيب الغاز
وراق وحليت له السهره

التانى هتلر كان مهووس
نهارة ضلمه وليله كابوس
بينط واللى عليه بيدوس
بيحط رجليه فى الحفرة

ملبوخ وهمه يطخ عيار
ممسوخ ومتلطح بالعار
نازى وغازى يبخ شرار
واللسعه من إفعى الكوبرا

كان همه يصبح إمبراطور
يشطح وينطح زى الطور
الهم هده وراح منطور
مقهور من الخيبة المره

د لوقتى ح نشوف عرض جنون
وع الهوا هتلىر ونيرون
والفرجه دى طبعاً ح تكون
مسرح وسىما وتليفزيون
على قناه ملهاش نمرة

الاحتياطى على الدكه
ومحاوره بين أبطال سكه
سمحت بها إدارة الخانكه
والماتش من بعد النشوره
الله الله يا بدوى جاب اليسرى

نيرون : أنا نيرون ونيرون أنا
عندى بلاوى مطينه
غدير الحريق والمدخنه
أضرب واخرى بالذره

هتلر : هتلر أنا والهـــــــــــــــــتلره
معناها ع الكون سيرطه
وعدتى متحضره
من الصاروخ حتى الإبره

نيرون : هتلر يا ابو الشعر مسبب
أما الشنب سن مدبب
عمال تحارب وتهبب
لما بقت سيرتك غيره

هتلر : سلم لى على عقلك يانيرون
صدق اللى قالوا عليك مجنون
بلدك بتغلى تحت كانون
ولعتها وانت فى سكره

نيرون : أنا كنت بالعب بالكبيريت
طلع من العلبه العفريت
واللعبه كانت أكبر صيت
وشهره لإيطاليا الكبرى

هتلقو : مش كنت بتـغنى الموال
بريابة السيد متقال
وكان مزاجك عال العال
وسهرتك كانت حمرة

نيرون : ياهر يا بتـاع المانيـا
إنت اللي دومت الدنيـا
خليت حـديدها ألمونيـا
وقلبت مصارينها لبره

هتلقو : أنا بنيت برج الرايخ
وأخذت فيه مقلب بايخ
أساس رصاص وجدار شارخ
مانفـعش قـمليك ولا أجره

نـيـرون : مش كنت مع إيفـا براون
وع السرير مدفـع هاون
وكان نهـا ركم مش باين
ولا دار يانين باللى ح يجرى

هـتـلـر : مظلوم وإيفـا مظلومـه
ماتقـولش مشكـاح ولا ريمـه
الانتـصار بعـده هزيمـه
والانتـحار أحسن فكره

نـيـرون : دي خيبه ومصيبه كبيره
لما افترينا على الجيره
خلاص بقى فضها سيره
دي شعونا منا بيتبرا

هتلر : مـا قـلتـلـيـش فـيـن العـنـوان
أصل الجحيم عامليـنه ليمان
وعشان مافيه أزمة إسكان
حطوني في الدرجة العاشرة

نيرون : زـنـانـه تـسـعـه ما انا جارك
ويننكوى بنارى ونارك
كتب التاريخ عارى وعارك
لاجل الطغاه ياخذوا العبرة

الراوى: باقى الصـهـيـانـه والكـفـره
مـسـتـنـيـن يـومـهـم بـكـره
والنـصـره مـن رـب القـدـره
الله الله يا بدوى جاب اليسرى

مصر النور

مصر يا فجر حضاره ونور
مركب شمسك عدى بحور
وشراعك في الكون منشور
وشعاعك صافى البنور

محروسه يا عروس الوادى
توبك فـرح وطرحك نادى
للأحباب بتمدى أيادى
والخير على بابك بيدور

ليلك تحلى معاه مرواويلك
ورايح الجنه في منديلك
واللي ما فاتش هواه على نيلك
يتمنى يجيلك ويزور

أم الدنيا وحاضنه ولادك
زادنا نعيم القرب وزادك
والأمجاد بتعيد أعيادك
وحصاد أرض الحب زهور

جامعه ورافعه رايات عربيه
شمعه ووالعه دموعها أبيه
وجناحك درع الحـريه
وبراحك قصر ومعمور

بلدى

عاشق جمالک ياست الحسن يا بلدى
يام عطره جنتک من وردک البلدى
الشوق بيکوينى فى الغربه عن بلدى
والعشق يحيينى فى القرب من بلدى
عزفت أنغامى من أفراحك البلدى
ولما قلت كلامى قلت له بالبلدى
لا دقت أو كل ولا أطعم من البلدى
ولا ليا أهل وحبائب غير ولاد بلدى
ولا شفت بعنيا أحلى من بنات بلدى
ولا عندى فى الدنيا أغلى من تراب بلدى
على شاطئ النيل
طابت هواويله
و آه يا ليلى ويا عينى على بلدى

برلمان النساء

أحنا النايبات المحترمات
فى البرلمانات.. سكرنا نباتات
والدم أخف من الشـريرات

لما اترشحنا ونجحنا
زيحنا الأعضاء اللى فى ريحنا
وصبح مطرحهم مطرحنا
نحضر ونصحصح فى الجلسات

بنصوت بالفم المليون
وان عزنا نسن قانون وكممان
وحذفنا نون النسوة كمان
ولزقنا مكان الراج شنبات

الفوضى بنقطع ليها لسان
ومعارضه بنخلع منها سنان
والنهضة التايهه بقى لها زمان
مين اللى يجيها غير الستات

الوضع عسير محتاج لعلاج
الكل يشارك فى الإنتاج
البيت والخلفه على الأزواج
وشئون الدوله على الزوجات

بولوتيكا بتتفبرك برواج
والويكه بتتسببك بمزاج
ومفيش تفتيش ومفيش إحراج
ومعانا حصانه عشان عضوات

كتب للمؤلف

ألقيت عصاي	ديوان
يوسف لكل العصور	مسرحة

نحت الطبع

شارع الأفراح	مسرحة
جبلالة القروى	مسرحة
الجوزا نولا	مسرحة
جنينه الحيوان	أوبريت
كلاكيث	أوبريت
سر العاشق	ديوان
ببغاء الغرام	ديوان
أناشيد الطفل المسلم	ديوان
نعمة القرآن	ديوان
مداح طه	ديوان
فى حب مصر	ديوان
الأسماء الحسنى	ديوان

الفهرس

الصفحة	القصيدة
٥	صد ورد
٧	تهيئات
١١	الحوافر
٢١	فوازير محلولة
٢٤	فى الملىان
٣٣	فلفصة
٤٢	عريس الغفلة
٤٥	صم وبكم
٤٧	سوق البشر
٤٩	قطر الصعيد
٥١	إنضباط
٥٦	كوسة
٥٩	لعبة الحرب
٦١	دنبا
٦٣	ثنائيات
٦٥	٣x٣
٦٨	كاس الهنا
٧٠	فردت الشراع
٧٢	إلى صديقى اللود
٧٦	ناس وناس
٧٨	قلم وجبر وورق
٨١	ما يطلبه الحيوان
٨٤	كوميدبا
٨٧	حوار مع بخل
٩٠	مريض الوهم
٩٧	نيرون وهتلر
١٠٥	مصر النور
١٠٧	بلدى
١٠٨	برلمان النساء

الناشر

دار النيل

للنشر والطبع والتوزيع

١٢ شارع عبده بدران

م الباشا - المنيل - القاهرة

ت : ٣٦٢٢٥٧٨

رقم الإيداع بدار الكتب

٢٠٠٢ / ١٦١٨١

الترقيم الدولي

٩٧٧/٥٤١٤/٣٤/٢